

水
南
集

二

欲乎知
如壽

PDG

水南集卷五

明德清陳
霆聲伯著

七言律詩

衛河夜泛

和人韻

千里關河一短篷，來迎春燕去秋鴻。
做殘鄉夢身還北，推起船窗月在東。
桂子冷傳衣上露，荻花清裊鬢邊風。
扣舷今夕知何夕，一笑分明在水宮。

送人之南雍卒業

笑指青山倒玉壺，夕陽催客上征途。
江湖別意雙詩卷，京國歸裝一畫圖。
海北定看鵬奮早，天南遙望鴈飛孤。
鄉心回首成愁絕，晚樹蒼涼鳥亂呼。

都人綴紅蠟成折枝梅或爲予致一枝愛而有

作

梁玉調酥點俏枝醉顏頰鬪丰姿香浮金翦春先透
水滿銅瓶月未知換骨有丹矚造化寫生無筆費詩詞
夜屏不減天然格爲報東風且勿疑

謫後寄鄉中諸舊

口毫無補費餐錢慚愧清朝侍從班仗馬分須鳴北闕
苦瓜何敢賦東山春風盃酒飄零後夜雨溪堂夢寐閒
千里故人知健否暮天落日見鴻還

至廬陽馬上口占

馬足凌兢石路斜酒旗青處有人家旅途未了叢陰夢

游女空歌陌上花春去漸知詩思減雨中還覺暮寒加
敝袍塵土成何事搔首東風只歎嗟

公事山行李明府以詩來因知回祿之災幾及
旅寓用韻奉答

山谷驚秋落葉紛馬蹄蹋破萬層雲遠勞信使傳佳句
獨少香柑慰細君宦況正於愁裏薄猿聲況值睡時聞
怪來心膽終麤率信步行衝虎豹羣

宣和畫鷹

寶和殿下灑秋毫五色絨絲玉雪毛翮健不誇胡騎疾
眼明應識塞雲高中原狡兔成正窟北海羝羊老節旄
愁絕鴈書傳不得夜寒五國慟青袍

山水小景

望中煙樹幾樓臺一片青山夕照開野渡有舟招過客
候亭無主傍秋槐十年人向天涯老千里書隨鴈翅回
撫景不堪身世異臨風長笛送餘哀

奉寄潘團山得致仕團山於正德初以言路廢
更化後再起

秋鶴春猿意味投青山歸辦小菟裘雀羅門巷宜高臥
雞肋功名懶過求釀酒倍栽坡下秫藏書新蓋竹間樓
雪晴定有梅花興明月南山好夜遊

霍山一名南山岳山
潘隱居近之

桃林春牧圖

太平有象重農桑
睠此桃林牧放場
金絡不教羈野性

繒衣寧復畫龍章
短簑飯後纔初月
橫笛歸時正夕陽
一歲閒忙較相半
東風春草又芳塘

子陵

世閒萬事一羊裘
曲直無心任釣鉤
天地已歸今日漢
江山猶占向時秋
乍煩帝腹紓雙足
終仗絲綸繫九州
展卷不禁歸興發
碧竿煙雨夢滄洲

許由

此生黃屋亦何心
向山林歲月深
鼠飲正消泉一掬
巖棲應笑業千金
已嫌空谷生天籟
尙被秋風聒世音
瓢棄蒼流重相笑
百年誰會伯牙琴

浮碧亭

在茗城南峴山之崖爲郡縣諸公行樂處

蒼茫千頃碧瀾湖誰著山楹面海圖淨卻唾珠龍窟近
冷涵秋影鴈飛孤一琴閒對成都鶴雙舄時來葉縣鳧
樽酒倏空詩未就黑雲催雨晝模糊

又

蛟涎魚浪濕青紅百尺簷陰覆水宮曉汲影寒茶鼎月
醉濡光動墨池虹山川半落冰壺裏風景都歸玉塵中
乞我釣簑時獨往石邊閒坐一絲風

又

落霞飛鷺水雲寬平挹湖光十二闌清比露盤承沆漉
靜宜冰簟展琅玕晚蟾漁浦涼如洗秋淚珠宮濕未乾
長嘯一聲波浪洶蒼漚千點去鳧寒

題扇

洞庭秋老水無波，繫岸扁舟木葉多。
紙上功名輸范蠡，世閒成敗付蕭何。
轉空海月陪詩夢，度水溪雲貼釣蓑。
一笑不關流俗事，爲君洗盞聽吳歌。

題畫

一笑浮名且罷休，世情消得釣魚鉤。
狂奴辭漢非無謂，司諫還山也自由。
風雨不驚遊子夢，江山都屬笛聲秋。
從今淨洗紅塵足，茅屋三間老白頭。

又

和趙松雪韻

宿酒醒來江上秋，青山消盡古今愁。
蓑衣不厭水雲氣，茶竈卻宜風雨舟。
千古何人共舒嘯，百年回首獨登樓。

寒聲怪得清雙耳門外長灘曉夜流

輓越江岑蘭谷

東風吹斷紫蘭春香谷空遺步履痕蝶夢不回莊子榻
酒壺難訪謝公墩月將顏色臨書屋潮送哀聲近墓門
千壘越山雲在眼一詩南去爲招魂

三潭夜月

以下仙潭六詠

老蛟全懶弄狂波向晚平潭月色和山翠已收眉尙淺
水光相盪鏡新磨客船有笛吹楊柳漁浦無鐙落鴈鷺
卻信仙人過舊隱冰絲彈處夜涼多

九井寒泉

鮮痕交砌土花凝海底靈泉各竅生釀酒煮茶功卻異

分江貯月派同清
炊煙出戶催朝汲
轆轤鳴秋雜市聲
醉後不禁詩吻渴
一瓢爭顧齒牙驚

南寺曉鐘

鬣杉瘦栢共陰森
飛簾懸鐘古殿深
聲散碧空霜下降
杵敲寒影月西沈
憑誰警悟先成佛
老我癡壘正擁衾
怪得暗塵遙攘攘
故知催動利名心

西溪夕照

汀洲漠漠樹依依
十里溪山正夕暉
村碓尚占三舍遠
客帆遙帶半稜飛
近灘漁戶將收網
隔水人家未掩扉
添得江鄉圖畫好
滿羣鷺鴨傍船歸

渚山花霧

非煙非雨細濛鬆遠近峯巒一色中香徑曉迷蜂蝶路
小池春暗杜蘭叢輕綃障面桃還笑薄黛勻眉柳更工
不道東風吹易散兩竿紅日畫橋東

桃源春洞

桃花流水認仙蹤古洞雲深有路通歲月足知秦網後
山川依舊鳥聲中尋眞忽遇紅雲島避世堪稱白石翁
擬貰百壺來野飲日將沈醉領春風

書慈孝村潮音庵壁

斜日菱溪水半篙柳邊輕舸繫長條青林招隱兩閒屐
碧井分甘一巨瓢歲月儘能容老病江山曾不厭漁樵
孤雲野鶴無他適來向空山訪寂寥

渡自後溪步至聽雨堂用前潮音庵韻

水落寒溪不受篙夕陽煙柳半蕭條徑殘蒼蘚僧歸錫
池有清泉客試瓢蝸壁雨餘添古篆鶴林秋晚墮枯樵
灰心得悟安禪法時向松關伴寂寥

遊有竹亭

細草幽香顯屐痕東風邀客爲開門竹餘新筍供茶料
樹借繁陰蓋酒樽行處謾隨陶令柳坐閒爭占謝公墩
醉歸尙有溪頭月莫管斜陽迫暮村

甲子中秋臨晚至亭上會客復用前韻

落日牛羊下晚村田家鷺鴨鬧柴門會循眞率虛邀客
飲散高陽倒臥樽千里共君看月色十年勞我夢槐根

胡床少屈陪清坐尙有新詩共講論

滄洲圖

里人溪居號

隱約溪山遠近汀水天連處暮雲平鴈來沙上點秋色
鷺向蘆根立晚晴滄海夢回詩被冷江鄉月落釣船橫
灣頭鱗舍憑招我相約攜家過此生

又

浦樹汀蕪斷復連江村風景畫中看滄波渺渺映溪屋
沙鳥飛飛近渡船十里水雲漁笛晚一竿煙雨釣磯寒
清宵更喜添清事夢繞蘆花月滿川

秋日書懷用胡衛文來韻

雨作秋陰慘淡愁小齋牢落閉詩囚滿堦木葉便於竈

一味菜根消得油豪氣獨推湖海臥西風誰在岳陽憂
廟堂定待封侯骨卻笑寒儒浪預籌

唁胡篋文守制用前韻

驚猿哀鶴抱長愁天地高深一罪囚三載墨線妨奪錦
五更黠鬼定澆油槐花空促風前馬萱草方遺夢裏憂
且誦蓼莪天保句平生忠孝要深籌

和韻贈沈一松羽士

曉窗研露墨塗鴉吟就懷仙閣筆誇青鳥夜傳雲外信
碧桃春老洞中花劍鋒冷浸瑤壇月丹氣新成石室霞
歲月自勞人自逸長生寧復鬢毛華

蓉江

友人中歲名未成因以自號

汀雲淡淡水茫茫秋盡江南滯采芳顧影未須嗟歲晚
倚雲聊且後春陽橫塘有月芳塵寂遠道無人落照長
卻向東風問桃杏可能勻面待清霜

陪督學黃憲副造奉國山寺拜瞻東萊讀書堂

退而卽事

籃輿兩兩度松風化國樓臺疊翠中山雨霽來溪碓急
野雲開後鶴巢空多年僧壁餘蝸篆終古書龕有蠹蟲
芳饗尙聞明薦缺瓣香低首意何窮
太守劉丹崖禱弁山得雨郡彥有志喜之作踵

韻一首

弁山龍臥雲冥冥有客瓣香來乞靈玉盆倒水走急雨

鬼斧劈松飛怒霆雙鳥忽然天際白
數峯依舊晚來青
登攜有酒暢民樂何處乾坤非我亭

卽席一律送太守劉伯儒之任湖廣憲副

愛山臺下一盃酒酒盡不堪生別愁
靈雨住施焦土澤
法星移照外臺秋五更畫角催仙旆
六月南風送去舟
後夜相思竟何處會教明月到西州

送掌教蘇肖泉陞任南都武學

十年曾伐月中柯三級其如退浪何
伏驥未忘瓊苑路
老龍仍借泮池波師門桃李春陰盛
武帳風雲壯氣多
金馬本來文學地
佗教側耳聽鳴珂

和練川池閣新成

面東

歸閒吾自愛吾廬新閣成來愜燕居初日射簷欣瓦雀
清池當檻戲文魚謝家夢裡餘春艸譚老牀頭只化書
怪得俗氛無路入竹陰長日護前除

追悼孫太初山人

招隱無人賦小山竹橋梅月寄荒灣

竹橋夜月爲道水場山八景之一

聲東去空多咽山色南來只自閒蔓草莫悲秋井竭夕
陽惟照野僧還傷心舊日巖棲處曾見詩瓢掛壁閒

又

調鶴長敲漉酒巾買牛還傍種瓜村栖遲高跡青山窟
零落遺骸碧艸根詩解窮人囊轉富道能輕世我常尊
西湖水月應同夢千古梅花是返魂

寓宿慈感寺

鄉書催上九重天，暫向僧家借榻眠。
燭剪夜窗紅影溜，茗浮春浪碧花圓。
長廊落葉無人掃，明月孤松有鶴旋。
自笑俗根除不得，幾宵塵夢故依然。

謁岳王廟

趙松雪韻以下遊杭雜詠

已自中原苦亂離，倉黃南渡更阡危。
杜郵甘使嘗秦劔，趙壁誰當豎漢旗。
養卒不歸讐且置，長城自壞敵難支。
空餘宰樹風聲急，相挾胥潮日夜悲。

悼文丞相

丞相勤王嘗頓師西湖之上，曩舉似僉憲譚先生之慨然，任作祠用配武穆既而未暇，未故云云。

紫蓋黃旗運已終，三閩四廣路還窮。
扶天漫協宮中夢

救日空彎馬上弓
頸血漉忠渾化碧
顛毛張怒尙生風
駐師地在誰修祀
冷落西湖武穆宮

悼少保于肅愍公

六月王師失凱旋
鴈門烽火接茸泉
河山再奠周家鼎
柱石高擎杞國天
計就東窗柑已破
血衝秦柱壁難全
新祠更近棲霞嶺
一種春風哭杜鵑

訪慶樂園

宋韓侂胄故物內元有十洞

遺鶯頽垣草亂侵
不堪傷古復傷今
土中園記零文石
閣下香山喪水沈
此日村莊無犬吠
向時筵樂變蟲吟
洞天奇石神驅盡
只賸枯松閱歲深

養樂園弔古

賈似道別墅中有初陽臺春雨觀

陳跡分明是禍胎前人留與後人哀
池乾春雨都無觀
林散初陽不見臺
月色暗來山鬼出
春光廢後野棠開
不堪當日湖山暮
有客漳南首重回

遊集慶寺

寺爲宋置妃香火院後卽妃殯宮寺僧存其遺像

當年金碧冠湖山
籠在椒房只等閒
化國旛幢雲影外
上方鐘鐸翠微閒
美人無奈成黃土
畫史空教貌玉顏
荒塚石麟秋草沒
夕陽無數牧兒還

冷泉亭有作

一泓常溢四時清
三巘從知冷得名
澗底有天秋作影
石邊流月夜無聲
山僧潔器供朝汲
遊客分甘解宿醒
欲盡一瓢還縮口
老年全怕齒牙驚

呼猿洞

青霞成片雲成堆，仙關玉鎖何年開。
巖前桂子落如雨，澗底泉聲殷若雷。
月明早向鷲峯照，暝色恰從天竺回。
三聲誰墮峽中淚，清夜孤猿空自哀。

弔聚景園

在清波門上下宋御園也今回回占爲墳

御苑曾聞近御溝，會芳亭殿備宸遊。
暖風柳浪啼鶯早，媚景花天幸蝶稠。
世改裸人營作國，日斜遊客避艤舟。
憑誰盡掘汪芒骨，一洗湖山穢汚羞。

水樂洞紀遊

石透雲空水發聲，嚶嚶咽咽更泠泠。
意非鍾子誰能解，耳在巢由想厭聽。
風外有時傳水調，月中無處訪湘靈。

知音六鶴須拈手誰翫山閒審樂亭

煙霞塢

鄰水樂洞

青鞋得得扣煙霞草樹叢邊石徑斜
碧澗作鄰供水樂白雲當洞護松花
山空常有狙窺椽僧出從教鹿看家
幽興忽終林影晚南屏鐘起見歸鴉

九里松

蔽日參天十萬松兩山南北路西東
髯龍臥地秋峯月笙鶴鳴臯夜壑風
游客愛隨青蓋影化人多住翠微宮
湖山十里非無景商略清陰欠百弓

孤山四賢堂

一杯薦菊汲秋澗千載招仙陳楚詞
賞月吟風地先約

山雲澗水句曾遺梅邊初月水仍淺晴後西湖雨更奇
卻笑當年真寡識凝塵空廁水仙祠

放鶴亭懷古

放鶴亭前一望時天寒不見鶴來歸山人引杖雪穿屐
童子開籠雲繞衣蕙帳夜空驚別怨海天秋淨想高飛
當時華表常留語不道年來信竟稀

登鎮海樓

和孫太初

高樓百尺鎮南垠落日孤帆見海津山繞鳳形懷晚宋
穴探雲氣記先秦塵埃正有西風扇身世那無漉酒巾
今古不關湖上事年年花柳自成春

尋三茅觀

觀近鳳山門

峰迴路轉覓琳宮，竊徑無人有鹿逢。
隱約湖山風景隔，參差臺殿樹陰重。
三峯涼月歸遼鶴，一洞寒雲臥蝮龍。
多少渡江南北客，早行常聽出煙鐘。

和遊紫陽庵

路轉三茅別是峯，紫臺遙映海霞紅。
庭松待鶴前山月，崖樹含秋古殿風。
仙向野亭彰羽化，有丁仙蛻骨在亭中鬼於陰洞劈鴻濛。
掛冠甚有棲真興，爭信神山在世中。

大佛頭

秦時始皇纜船石

海上何年失巨鯨，化成梵相倚崖高。
法門露頂皈依眾，大地藏身宴坐牢。
滿月十千輸眼界，晚山一髮見眉毫。
從知著糞煩湔洗，不換秦時守纜勞。

九
五
青衣泉

卽韓侂胄闕古泉也在重陽庵內今湮

往事淒涼不可論重陽庵是宋豪門泉湮闕古堂安在
級斷桃坡石尙存蒼鼠避人從瓦竄烏龍防客傍堦蹲
青衣仙跡無因見古洞莓苔手自捫

上巳日諸君子雨中遊勝果寺遂登月巖時以
不預和答前韻

煙迷春樹霧迷空依約湖山一望同故國鶯花恆雨裏
上方臺殿濕雲中停盃難問陰巖月修禊空懷曲水風
想見聯鑪嫌坐懶衝泥吾正憚乘驄

又

勝槩關心俗慮空陰晴剛變覽觀同地當怪石長松處

春在濃煙淡霧中，疊嶂暎來天竺雨。怒潮驅到海門風，
何時霽月償佳會。扶醉巖前上玉驄。

中秋偕客西湖翫月有作

早熟菱荷已半收，湖光開展月光浮。水風吹面不知醉，
山翠濕衣殊覺秋。驚鵲可堪如逐客，跳魚時見入虛舟。
夜闌更整蒼龍佩，直欲凌風海外遊。

歸舊業偶書

馬首黃塵記宦遊，素衣緇盡始回頭。溪山有舊不妨睡，
風月多情自進樓。名位在人真畫餅，乾坤分我共虛舟。
詩腸何遽難成飽，消得山林一味秋。

滄洲歸老

抖擻京塵及布裘西風歸事五湖遊滄波白鳥萬江雨
野水閒雲一釣舟自計早衰尋穎尾可能垂老困壺頭
濟川浪許平生業回首斜陽野渡秋

東溪

滄洲別渚蘆花夢併作東溪一片秋孤鴈掠汀山月吐
斷虹垂影水雲收晚歸漁艇衝斜日西望雲山對遠眸
倚杖有時來看水卻將閒適羨沙鷗

答龍西溪大僉用來韻

世事流年兩逝波青山歸計有松蘿心怡閒曠嶺雲白
夢落蒼寒江雨多敗甌已能忘反顧缺壺時復佐悲歌
相思不遠青苔水他日扁舟鶴共過

又

楓落吳江水不波西風林屋戒寒蘿青氈一榻世情冷
黃葉滿庭秋意多老去醉鄉堪坐嘯向來春夢付行歌
論文尙阻溪山會大半浮生惜浪過

春草

暖意全回綠意勻芳原補徧舊時痕一千里路秦川晚
三十六陂江上春細雨有情添碧色落花無語共黃昏
何緣不棄閒門巷賴得東風是故人

寓山寺以有所候至三日

路轉峰迴僕馬疲古杉陰下宿招提茶煙一縷有僧榻
村舍幾家無曉鷄秋晚黃蘆喧夜雀天寒紅葉滿山谿

蕭然便作山林夢連夕雲巖伴鶴棲

壽人八十膺冠帶之寵 二月十六日誕辰也

淺黃楊柳未藏鴉春雨江南釀杏花人喜蔗鄉榮白髮
酒和花月照烏紗神山歲滿仙桃熟瀛海書來鶴算加
已約年年開笑口東風憑作壽圖誇

思炎卷

里南陳氏以六月生母歿之後追念劬勞請予賦此

薰風吹不到慈幃避日萱花正斂眉扇枕漫思江夏孝
弄璋方詠慶筵詩劬勞信有三年愛長養仍當六月期
一寸酸腸終古熱淚流長在汗流時

東山居 和孫太初

我生鹿豕甘同羣齋鐘粥魚朝復曛春泥兩屐蹋松子

布被一床攤野雲壁間酒甕謝惡客竹下籜冠陪此君
修琴歸晚暝入戶抖擻兩肩成市氛

過野寺有作

和孫太初

古杉敗壁前朝寺短策偶來娛晚晴雲峰如我意思淡
秋氣著人毛骨清空梁僅可辨歲月斷碣已看殘氏名
莞然一笑踟歸影小犬吠人蘿月明

林閒偕野叟

綠野青林少是非矮童瘦鶴慣追隨平生能着幾兩屐
長日惟消一局棋世故不堪頭易禿宦途無奈力先疲
縱談何敢關時事只與田閒較歲時

花衙

柳絲拴縛百花棚綠密紅稠太有情錦幃乍聯春氣暖
肉屏斜合夜香凝賺來蜂蝶無從出攔住風光不放行
閒得芳條縈綠鬢繡裯時見墮釵橫

無題

用劉欽謨韻

錦瑟年華玉樹風鳳臺闋苑禁城東三秋紈扇歸陳篋
半額蛾眉進後宮出塞手痕空怨綠渡江桃葉竟飄紅
春來謝遣行雲夢慚愧楊花繞帳中

又

香羅曾記染啼痕愁絕關山萬疊雲玉枕夜寒敲永漏
錦機春晚住迴文花生寶蠟私占喜麝冷雕盤不耐薰
莫過天津橋下路杜鵑哀怨不堪聞

題春浦卷

燒痕青處春回浦
夏幄濃時綠蓋洲
百歲光陰消話柄
一軒風月費茶甌
睡魔忽落海門曙
詩思欲生江上秋
客退不知時早晚
滿羣鶯鳴下平疇

題扇

疏林黃葉動秋風
隔水蒼山夕照中
沙鶴不歸江磧冷
客棊初散野亭空
乾坤高帽須吾輩
風月吟情付乃公
剩載綸竿籠鬪鴨
海雲招手太湖東

倪元鎮畫

號雲林

寶香銷歇野航沈
淚與灘聲咽夜深
春圃獨存蛙在沼
晚雲空候鶴歸林
依僧止有隨緣飯
行樂都無買笑金

千古卻憐遺墨在澹煙寒樹意蕭森

愚隱軒

閑人休用笑愚公皓首工園道未窮舉世有人投陷穽
我生多幸外樊籠朝三可道羣狙智格五都來腐鼠雄
一笑不知門徑事白雲長在萬山中

秋江晚釣

七澤三湘一釣絲夕陽明處見茅茨鷺依淺水秋堪畫
人在滄江晚更宜黃葉隔林長有雨青山覲面可無詩
扁舟剛避人間險慚愧風波十二時

送人知六安州

蹋槐曾作少年遊高度青冥一鶚秋匣劍久鞘衝斗夜

郡符新下夢刀州雨前口茗春陽早笏外南山爽氣浮
相送一言煩記取大廷方簡富民侯

菊圃

手理西園十畝荒幽花栽遍淺深黃山城帶暝三秋雨
澤國凝寒九日霜地有金錢風景富潭餘野水壽源長
持螯把酒閒人事回向陶公一瓣香

吳二尹西湖圖

吳蜀人

水天花影暗朧朧疊巘重湖曲路通三百寺藏春樹綠
兩高峰對夕陽紅香車多遇催花雨畫舫徐撐落絮風
總道宦途容易隔爲君圖本向川中

四皓圖

秦家日月漢山河白首相看老薛蘿
瑤艸自成方外藥
紫芝曾入洞中歌
弋人昔謂冥鴻遠
碁局今看著數多
獨怪輒紅污兩足
可能末路尙婆娑

過揚州

紅樓十里控簾鉤
應數淮南第一州
觀有瓊花招過客
岸多隋柳礙行舟
畫橋夜月吹簫管
繡幙春風賣酒籌
游興卻闌行色早
短帆衝曙下邗溝

平湖秋月

斷虹收盡湖中雨
孤鷺衝開水面霞
晚翠秋容澹相向
水光月色正交加
已無蓮舫鳴歸槳
尙有漁人理釣車
最好夜深清景合
一灘寒影浸蘆花

夜坐

紅燭清酣照畫屏
捲簾秋氣入軒楹
雲閒微月養時晦
露下小蟲司夜更
清裊夜香陪我坐
響傳長笛是誰橫
悲悽無限西風意
屈指流年夢暗驚

文山詞一縷
燕香清裊

秋懷

破屋西風冷敝袍
坐將日子付詩瓢
忍貧學得后山面
習懶做成彭澤腰
雨後青山情不厭
秋來黃菊興偏饒
棲遲大類揚雄跡
獨笑無才著解嘲

秋夜

碧梧涼氣沁窗紗
清滴銀床有露華
雲母小山屏影薄
珊瑚新月帳鈎斜
衣篝夜料添沈水
硯几秋香貯桂花

門掩月明金鎖靜，禁人魂夢到天涯。

又

眞珠隨手上簾鉤，鴈字書空月滿樓。
香篆暗消銀燭夜，扇羅新別畫屏秋。
紫臺環珮風前振，碧井梧桐露下愁。
清思逼人眠未得，商聲更動樹西頭。

中秋後三日與客夜坐

碧墮瑤簪懶髻鬆，坐深低月上梧桐。
界空匹練秋河白，照室雙蓮夜燭紅。
虛幌桂花香縹緲，小樓簷鐸韻丁東。
宵分尙有閒生活，相對談詩興未終。

閒中遣興

一春飽食穩看花，眞賴溪山遣歲華。
竹裏構亭留客路，

柳陰撐舫犯鷗沙夕陽半嶺吟筇晚林樹重陰坐席斜
獨被亂蛙噴道懶五更煩聒報人衙

北京寫懷

東風三月柳花飛爲客燕山未放歸池館有蛙驚夢短
海天無鴈得書稀坐看紫陌鶯花老臥想青山犢笋肥
身世已拘時事改向來猿鶴竟相違

漁隱卷

半世功名一野航水雲回首是吾鄉青山自覺面顏好
白鳥不知人世忙已辦持竿坐煙雨更看橫笛弄滄浪
餘生不作雲臺夢剛笑磻溪有釣璜

謝後涉園自遣

短鞭曾記走京華回首雲林歲月賒北闕尙懷鳴仗馬
東風又落笑人花向來夢境迷蕉鹿病後疑心釋酒蛇
藉手一盃聊自給非畦蔬徑擷芳芽

齋居遣懷

孤齋風雨砌愁城日遣青蚨募酒兵吟苦只教詩骨瘦
懶便都覺宦情輕庭堦夜霽梨花月簾幙春閒燕子聲
芳緒不成時節晚醉曹騰裏過清明

春日病中漫成

綠意紅情上蝶叢芳原近在畫橋東春醒連困杏花雨
午夢杳隨柳絮風門外有情來舊燕湘中無信斷歸鴻
青春行樂他人事藥裹薰爐自病中

壽人母 三月四日

纔領風煙褫水濱又借花月慶生辰
星躔婺女祥光現日捧黃雲泰運新
瓊樹有輝粧閣曉綵衣翻影舞臺春
飛瓊更奏雲璈曲憑仗西池送酒頻

西曹休日飲貴侯第夜久止宿一首

錦堂屏障映烏紗發碗春雲疊進茶
坐聽古琴嗟別鶴醉濡狂墨笑塗鴉
寶香薰被仙都夢銀蠟窺人午夜花
睡覺忽驚鐘漏曉起聯朝馬赴東華

溪山文會圖

高人已別溪山去猿鶴栖栖怨失羣
春水放舟孤問字夜窗明燭罷論文
新詩有料堆黃葉古屋無人鎖白雲

只任貴游來往數歌呼終日醉紅裙

閒居漫興

焚香卻掃下簾鉤盡日清閑若退休有竹百竿醫去俗
得梧一葉報來秋書門正可方廷尉束帶無煩見督郵
趁此好窮天下理未甘虛浪醉鄉遊

守宮詩

戲效湯東谷

心事誰教屬絳紗
麝香易解跡難遮
無端尤物能輸血
不管青娥欲破瓜
紅豆媚人春在肘
丹砂凝腕玉生瑕
芳年竟阻鴛鴦會
腸斷銀鐙午夜花

又

已恨重鑲罽洞房
悶人更守禁人方
裏來猩血鬪情事

點作臙脂記臂粧春跡故難瞞阿監貞心留取待君王
相看休比霜紅葉拈起傳情越斷腸

題雨花小像

松下山門白晝長此中渾與世相忘白雲夜冷龍藏鉢
黃葉秋深鹿繞床泡電已空三世業頭顱相近百年霜
須知灌頂餘甘露慙愧南閻沃沸湯

讀匡山誌有感

用前人悼陸丞相韻

海門一字釘樓船失計無如此見偏一旅盡亡興夏眾
六更終訖過唐年去邠已恨無奔地出趙從知有定天
千古慈元幽憤在午潮聲咽廟門前

崖山大忠祠

用陳白沙韻

陣勢故難當北馬香煙徒遣逐南風滄溟不盡填波恨
赤手空圖救日功天使米田成一統人將血食報三公
追思更益淒涼事骨塔會聞鎮廢宮元混一後有神降筆于武當云九九
從知有數清明節後開花米田天下亂如麻直待龍蛇
繼馬依舊中華福地古月一陣還家當初指望饗生涯
死在西江月下按元氏納后世約配于饗吉氏此句蓋
含順帝非饗氏所出之意蓋時謂順帝爲趙微也又順
帝殂于應昌以乏材與取木于彼寺之殿梁其上隱隱
有西江月一詞卽前闕也亦異甚哉米田句蓋不滿于
天倖存乎人之意九九爲陽九清明乃百六中國當此
際乃厄會也必主亂離

漫成

頭童齒豁七旬餘辛苦揚雄尙著書門外設羅常有雀
手中彈鋏竟無魚布衾麤辦撐秋夜塵甑還愁偏午廚
黃葉一庭雲一榻山堂風景類僧居

自遣

天賦閒情可柰何
雪霜況未上頭顱
煙雲下筆詩千首
花鳥當春酒百壺
已愛身心同誕馬
不將唇吻賦靈烏
懸車幸了黃塵債
春夢無煩繞路途

自笑

學道無成每自慚
區區七尺但長髯
大篇何敢言文字
細務還教涉米鹽
障眼苦無仙鶴草
禦寒誰有火龍襜
平生習病眞堪笑
傲骨橫腰不受矜

偶成

兀兀醺醺任醉醒
倦將雙眼看人情
黃金似水東西去
白髮和愁日夜生
短褐僅堪供歲晚
東風全未放春晴

世途回首還堪笑四十年前只暗行

僧人致政歸

神武門前早掛冠歸來松菊尚依然謝公自有登山屐
季子寧無負郭田午枕熟□三鳥夢釣舟輕泛五湖煙
華亭唳鶴東門犬大不如公識見先

悲秋

搖落山川知晚秋日蒼雲澹遞生愁長河斷梗漂何所
斜月清砧搗未休久客正悲王粲賦敝裘剛厭子長遊
西風一意催時節不道浮生易白頭

湘江煙雨圖

叢竹中有枯木

煙雲漠漠雨昏昏一片瀟湘古意存望遠不逢人返棹

懷歸惟見鳥投村逢春居士無生意向夜孀妃有淚痕
老我歸田卻相喜擬須深處寄柴門

韓有木居士詩

友竹卷

進退韻

餘子紛紛何足數此君落落獨堪親相期歲晚立冰雪
不獨春深長子孫仙籟已煩清俗耳碧雲還藉隔紅塵
清風日日攤書臥怪得先生懶出門

與錢學士遊西湖一首

積雨初收露兩峰水光山色瀉長空畫船載酒來天上
青鳥銜花入鏡中檀板歌聲無越女翰林詩句有唐風
勸君莫惜淋漓醉明日啼鶯怨落紅

戰爭蠻觸竟何爲，不值煙波一釣絲。
淺水月寒常有夢，冷江楓落最宜詩。
數莖華髮黃塵淨，千古高情白鳥知。
向夜醉餘風水靜，自將秋意笛中吹。

滕王閣

青紅高閣枕江湄，閣外江流碧玉圍。
半夜客帆真羽翰，一時賓履盡珠璣。
鴈邊南浦迷秋色，簾隙西山送落暉。
鳴玉忽收時事改，月明惟有釣船歸。

岳陽樓

鏡中一點看君山，木落天高水正寒。
明月吟飛誰復見，西風憂樂世誠難。
客邊歲月孤舟晚，鳥外汀洲夕照殘。
盃酒未闌人未散，喚誰橫笛倚闌干。

黃鶴樓

白雲黃鶴兩何之，千古江樓只舊時。
微雨送涼歸玉笛，晚蟬催日下牙旗。
胡床且盡樽前興，鸚鵡休誇席上題。
歸騎忽迷心目亂，渚蘋汀樹正參差。

八月八日奉壽臨泉殿下

先期有五鶴飛繞之祥

鴈邊景物中秋近，海上雲霞五鶴旋。
人倚瓊樓望明月，酒和玉屑瀉華筵。
繽紛桂子天輸粟，爛熳祥光地有仙。
劍佩鏘鳴賓客散，笛聲催曉洞中天。

巡行和壁間韻

澄清未了晚登車，晉國山河夕照餘。
霜後正燒青塚草，鴈來誰附使臣書。
三聲譙角風前戍，一抹炊煙野外居。

途路十年私養缺白雲回首舊茅廬

春浦志隱

夜涼春月珠生浦秋晚寒蘆雪覆汀負郭小營眠犢地
面溪斜構浴鷗亭木奴千樹辦租絹烏鬼一羣陪釣船
門外夕陽多少事先生醉眼未曾醒

和肖平麓暑雨晴後漫賦

蟲引青絲拂樹長蟻尋空垤上堦忙雨軒燕子烏衣潤
風檻芭蕉綠扇涼飯後簟紋攤水浪靜中騷句味蘭芳
清詩瀉我冰壺露正遇文園渴肺腸

再用韻寫懷

短世都來一夢長占人閑處看人忙案無公事且偷睡

窗有南風肯借涼百計正堪雙白鬢一年能遇幾紅芳
當知肉食難裨補好乞山林舊菟腸

有感

紫陌看花獨後時夕陽疲馬意遲遲阮公身世經旬酒
杜老窮愁滿肚詩梧影夜寒空署月桂花秋老故山枝
江湖路梗風塵闊何處還堪展釣絲

又

薄宦勞生十二時稍知求道已嗟遲客聽風雨常妨酒
公案光陰幾到詩春夢正迷芳艸渡閒愁多聚落花枝
頻年擺脫還虛誤慚愧胸中掛寸絲

書屏閒言懷

障裏江南夢裏山七年身世簿書閒
鷓鴣夜足寒枝月
首藉秋空老驥閑
長有窮愁妨樂事
久無裨補愧朝班
摩挲尙有床頭劍
一醉聊開壯士顏

蟠桃

海山春色點丹砂
歲滿三千樹有花
赭袖漫思留異種
錦綉曾屢到仙家
香凝金掌三秋露
味美瓊筵五色瓜
侑我一盃同不老
百年雙臉暈朝霞

乙亥中秋與客夜坐用韻

露井涼生丙夜秋
寒砧清斷練初收
一年好月依期滿
千里明河拂樹流
仙珮有聲諧藥杵
唾花成點沁茶甌
乘鸞甚起翩然興
誰在瑤京十二樓

汪京兆山居三首

仁峯精舍

養拙讀書之所

眠雲臥霧屋三閒，老慣山林夢亦安。
巖桂有陰秋墨冷，候蟲無語夜鐙闌。
瀑飛蒼壁琴床潤，蠹入青編字跡殘。
卻向朝來撐兩頰，獨留山色靜中看。

聽玉臺

北園有竹百竿，卽其林隙地砌石臺一座，臨風聽竹故名。

枕流雙耳未全聾，飽聽瑤臺戛竹風。
簫管忽傳雲影外，珮環疑在月明中。
春蠶葉底聲難並，夜雨篷閒夢畧同。
坐有籃輿眠有簟，天將清事付山翁。

篷窗

北瞰溪流南面石塘，規筏篷之制，故名。以竹剝節覆之。

小窗規制類方舟，覆蓋還看效竹樓。
雲氣最宜書榻曉，

雨聲常作釣篷秋詩連矮壁妨題鳳闌傍清溪便狎鷗
更著蘆花橫淺水西風卻好夢滄洲

贈胡夢石

用胡裳文韻

謀生豈問四立壁處世眞成七不堪青天月色酒在手
野水菊花秋滿潭看山樓上簾常起夢蝶庵中睡獨酣
眼望碧雲拈鐵笛欲騎黃鶴當桃驂

白竹墨菊

歸來三徑傍林坳野竹條條菊數莖仙子玉簫攢鳳羽
騷人秋墨注鷺翎最宜皓魄陪清夜未害緇塵染落英
百歲相看秋更好晚香高節渚山亭

蒼龍溪新宮圓

花木參差日晷閒，碧堦蒼蘚覺清寒。
水喧畫枕來堂下，松作秋陰墮硯閒。
風雨不關仙世界，笑談皆著晉衣冠。
何年更屈芙蓉主，海上清風降珮環。

寄潘團山

短刺長鞭久倦游，爲君猶作故吾羞。
燈花細雨淮南夢，木葉西風洛下秋。
諳盡世情惟自語，養成窮骨更何求。
新來湖海交游少，見說元龍懶下樓。

贈南山庵道者

用座客韻

滿樓山色一閒人，盡日清香悟道真。
獨枕夢醒常近午，小庭花落不知春。
生涯已辦儲餅粟，世事從教有劫塵。
擬借一杆陪此老，便同商嶺避咸秦。

嚴解元遊吳中

天涯同路歎浮沈
夜雨新豐冷客衾
千里每勞遊子夢
百金難轉故人心
月明夜舫聞長笛
楓老秋城感暮砧
立馬一盃情有限
停雲無語伴長吟

送弟霽回

黃葉蕭蕭擁客程
驛塵飛襯馬蹄輕
鶴鴿千里暮雲斷
鴻鴈一天秋月明
春草有詩還入夢
夜床聽雨定關情
西風向晚仍多事
傳到江城搗練聲

東翠號

嶺表仙城海上山
東風吹綠到人間
管生榻外午陰合
謝客屐前芳艸閒
總几最宜秋爽入
樵蘇常對夕陽還

無因挾我登蒼頂萬里清飈振珮環

秋牡丹

葉如牡丹花作紫豔色至入九月乃開
因名

繡幄金瓶事已空天將春意付秋叢繁華有夢蓉城裏
紅紫無言桂露中傾國尙堪迷晚蝶返魂何必藉東風
惜芳別有雕闌地遮莫霜華點翠蓬

春夜江亭餞別

高樓明月漾清輝聽理瑤箏十二絲別酒不堪銀燭夜
春情正值杏花時江魚隔浦煩書信玉樹臨風費夢思
猶謝垂楊繫行舸兩堤煙縷互差差

題沈履德賞花卷

賞花天氣夾羅衣晚院凝香漏水遲酒瀉玉壺延聽雨

燭裁金翦候敲詩
菅騰醉眼人俱困
浩蕩春心蝶未知
歲月不留頭易白
東風空憶少年時

嚴溪舟中

溪路縈迴溪水深
小舟真擬泛山陰
曉看風雨閒吹笛
夜夢江山醉擁衾
三折尙慚醫未透
一麾先引病來侵
東歸便欲尋漁釣
問訊嚴灘熾碧潯

客懷

東塗西抹十年前
老大蛾眉敢鬪妍
青史功名付春夢
碧山情思坐啼鵑
隨行自笑歸來鶴
訪舊眞同興盡船
容易銷魂門外雨
客衣還是暮寒天

又

湖海經年歎轉蓬，壯懷銷盡酒盃空。
楊花客路江雲外，燕子春寒旅舍中。
世事未明蕉下鹿，交游易散雪天鴻。
重來杜牧餘雙鬢，慚愧茶煙榻畔風。

和芍藥二首

暖日斜烘錦障移，似貪濃睡獨開遲。
牡丹亭小春長滿，孔雀欄高影半欹。
情逐綵雲空有恨，淚含紅雨更多姿。
須知絕色還雙美，作配花王也自奇。

又

□影扶春日共移，怕開愁謝意遲遲。
玉人睡起紅綃□，金屋粧成綠鬢敲。
謝蝶又迷歌酒地，姚花全畀豔□姿。
獨憐歲作羣芳殿，合向東風歎數奇。

贈嶺南劉舉人之春闈 用李二守韻

眼空湖海氣橫秋
匹馬西風指帝州
三島醉鄉遊閬苑
五更詩夢掛羅浮
可無雲雨翻龍窟
須有聲華出鳳樓
猶記酒酣誇得意
春風十里上簾鉤

秋夜有懷

□氣侵人冷畫屏
瀟瀟庭竹動秋聲
兩年故舊曠盃□
千里美人同月明
病起自知腰帶緩
悲來誰擊唾壺鳴
坐深忽感年時事
烏鵲南枝思暗驚

午睡起偶成

睡思瞢騰正要茶
畫簾人靜報蜂衙
石榴放出兩三□
海燕飛穿四五家
門外雀羅占世態
夢中蟻穴賺□華

謝家春艸閒人事付與新詩得自誇

送鍾秀才歸越

寓休寧作

□□江湖世味空已將歸夢寄詩筵
一千里路嶺雲外
三百六灘江雨中築館幾時延
郭隗徙官中歲笑揚雄
何當一舸尋狂客共看東湖菡萏紅

東湖卽鑑湖也

遊山寺

四簷修竹滃青蒼不著紅塵到上方
得暇偶來參玉版
對談因與借禪床迷途頗覺功名誤
浮世空驚日月忙
輸與此閒心易了閒中經卷靜中香

丁卯中秋與李二守對坐

玉宇澄秋一鑑明九天風露發晶英
使君北海樽常滿

老子南樓興倍清千里相看驚聚散百年難保是陰晴
更闌笑撚桓伊笛相對胡床睡未成

秋眺

木落淮南九月秋鴈行斜去渡衡州兩竿紅日山椒下
一髮青山海外浮暝色客投無主寺笛聲人倚最高樓
西風滿眼滄波意欲問漁人借釣鈎

贈崑山子無上人

野鶴閒雲自在飛世間何處有危機風生湖海新談麈
塵避雲山老衲衣秋榻暫依臨水寺春盤還憶故山薇
因君記得楓橋路夜半鐘聲出翠微

送阮上人歸甘露寺

布鞋錫杖走天涯是處青山卽當家雲裏五臺瞻佛國
日邊雙闕到京華西來戒臘庭前樹南去歸裝海上槎
塵債已償清業在滿江秋水沆袈裟

求田不成柬呂子克厚一笑

老去心情只自憐總將生計付蕭然千金莫售屠龍技
二頃空謀養鶴田月夜水寒魚卻餌雪天興盡客迴船
長饒依舊尋黃獨慚愧空山度歲年

終慕卷

百年先德拄門楣回首音容繫夢思宿草故深三尺土
悲風恆動五更枝所嗟逝水無迴日剛信羹墻有見時
歲歲芳原寒食節一盃澆向九泉知

施侍御哀怙卷

少無瞻怙壯何依寂寞寒塘晝掩扉
夜月不歸華表鶴春風空長首陽薇
墨痕慘淡餘哀些淚點縱橫有故衣
寸草正芳萱尙茂囑君努力報春暉

春陰

冷煙疏雨濕池臺漠漠頑雲撥未開
不柰曉寒花退縮似疑昏晚燕歸來
夜香庭院無新月秋景園林有落梅
總是梨花渾得意朝雲連日夢相陪

壽詩 僧鳳以壽

九苞文采故超凡名在襄陽傳記閒
日捧黃人天運泰杖攜綠玉地仙閒
瑤池啟會欣桃熟蓬島傳書見鶴還

綵袖舞餘歌鳳德酒中花影耀紅顏

五頭瑞蓮

陳司訓官舍偶產時謂是歲邑士發解之兆

錦雲窩裏種芙蓉解使雙葉怨恨空涇粲乍交雙隗頸
洛妃新御五花宮源通丹桂平分月香逐青芹別是風
爲瑞恰看臨泮水會須標作狀元紅

贈章廷直

進退韻

翩翩靈鷲羽毛奇洒洒清談玉雪霏願愷筆頭無俗畫
杜陵驢背有新詩碧雲作合當春暮今雨臨門值燕歸
聊藉東風一盃酒西湖還訂後游期

踵答章廷直

少年作賦慕揚雄晚歲風花一笑中谷口謾傳名譽好

世閒未見是非公，千金買駿羞駟僮。十樣呈眉賞畫工，
舉似青山渾厭薄。住君癡坐聽松風。

送人之京闈應試

馬頭風雪撲行囊，三十功名道路長。白雪才高堪獻賦，
黃金臺好未思鄉。嶺雲欲作夢千里，海月空驚天一方。
春酒醉餘雙耳熱，轟雷仁聽到林塘。

春日雨中書懷

淹旬風雨未開晴，曉鏡看餘慨歎生。白首故交今有幾，
青山生計竟何成。依棲梁燕愁無訴，狼藉梨雲恨不平。
庭草漸深春又晚，一番岑寂過清明。

題畫

蕭蕭落木楚江秋江上西風襲布裘白雁不來空北望
碧川如赴竟東流百年身世雙蓬鬢千古功名一釣丹
卻顧夕陽懷遠道暮山依約斷雲愁

竹窗

吳人號

蒼靄碧陰層復層旋從雲竇啟山楹相看一榻斷塵氣
時聽四簷來雨聲手製籜冠存古意日將詩卷了餘生
客來自着清風引莫訝先生不出迎

芝谷

隱者號

南山北山雲氣多短衣露脛行且歌九莖自信勝薇蕨
四老見招同薜蘿丁丁伐木碧松塢呦呦鳴鹿青草坡
百年正爾夕陰促柰此清泉白石何

白平五舟次楊村

去京師百里

斜日丹楓住客舟雁行南去正書秋岸頭沽酒難浮畢
篷底拋書尙夢周夜案有油驚黠鬼曉窗開鏡訝兜黎
帝城百里揚州路太息何人跨鶴游

和游雁蕩

夕翠朝嵐擁不開海濱剛見小蓬萊疏松澗古幽泉咽
明月峰高旅雁來雨意獨迷羅漢峽晴光遙映越王臺
年來湖海艱行腳慚愧登高作賦才

留別諸京貴

和張宗惠揮使張棄文就武

黃金何處覓高臺破帽西風滿面埃山下楚人空有淚
館中翹士正多材十年未長青萍價百念先成畫燭灰

拭眼道傍觀紫陌看花前度記曾來

蹋雪探梅

溪橋風雪撲人多奈此寒梅動興何短屐欲尋詩裏畫
淺斟聊輟帳中歌月香水影愁難遇粉蝶霜禽幸未過
落蕊滿頭歸去晚幾經玄髮半成皤

雪後送梅

褪粉銷香落意多角聲哀切怨誰何挽留殘雪花光筆
斷送東風阿素歌句出黃詩無計遣愁須我醉多情立馬是
誰過調羹事晚空搔首短髮年來漸易皤

題六安八景

龍潭秋月

煙林蒼翠晚來收放出龍潭兩岸秋一顆乍懸珠客淚
半灣新印釣魚鉤胡床有客能橫笛牛渚無人共泛舟
獨好蘆花藏宿雁照他清夢到南洲

漁灘落鴈

西風吹度海天秋相喚相呼古渡頭萬里遠伸弧矢志
五湖寬作稻梁謀連翩陣勢驚漁火嘹唳寒聲近客舟
夜靜不聞瑤瑟怨碧灘明月夢悠悠

西湖賞蓮

浮萍開處湛清波翠蓋紅粧擁簇多已約畫船攜美酒
獨無白苧唱新歌水宮露冷披袍錦洛浦塵輕想襪羅
沈醉載歸湖上晚一眉新月漾修蛾

道觀晨鐘

虛皇朝罷漏初殘，百八疏鐘破曉寒。
響逐宿雲穿石屋，清和殘月在瑤壇。
驚心客館催行急，腸斷春閨遣夢難。
獨有道人醒悟久，慾波情水坐來乾。

春日與李二守遊北郭至溪岸坐飲

柳絲搖拽弄東風，人倚桃花鬪面紅。
韶景易消千日酒，濤聲誰撼萬株松。
登臨有眼超塵外，身世無憑落夢中。
莫怪使君胸次闊，固應北海較豪雄。

九日與客坐雨中，命觴感潘邠老滿城風雨近。
重陽之句因賦一首，末句以遷謫也。故云嶠南

云

酒盃難得渾無事風雨何妨暫有時吹帽淋衣原不惡
倒冠落珮更何辭碧油爲我充新障黃菊於人實故知
從此山城添故事不應偏後嶠南詩

壺天圖

乾坤未必人閒大日月惟應世外長伎倆正堪齊夢鹿
路歧多半蹈亡羊已看桃核遺方朔會有壺天寄長房
歸去亦知仙界近碧山松竹正清涼

挽介石王二尹

王舊丞子邑旣而謝事歸其在邑遇子最厚故詩及孺子事

十年春夢轉頭空三徑秋光著意濃下榻舊曾延孺子
上樓常擬拜元龍閒門忽謝先生柳孤塚新移處士松
老淚滿眶無處滴蒼山落日暮雲重

月夜李二守對酌因用韻

半臂香羅擁暮酣舉盃邀月客成三酒錢近屢煩司業
樂府新能敵順菴未愛金釵圍妓女且須茗椀對瞿曇
中年漸覺淪衰颯欲問長生飲菊潭

送章子仁還吳中

子女兄丈也

滿船明月載蘆花萬里江湖浩蕩家琴調有時思別鶴
酒盃隨處辨驚蛇三年鄉夢燈前語一夜歸心海上槎
搔首西風停匹馬天涯兩眼淚橫斜

書懷追和東坡韻

夕陽宮葉墜秋衣尙記分番直瑣闥履底星辰看獨上
馬前燈火訝初歸江山風物眞如夢詩酒流光去若飛

已向西風思退步此生何止僅知非

遊南岳 和嚴解元韻

南山佳致誰當並曾記臨安詫紫陽已借白雲温臥榻
更煩蒼瀑洗詩腸天涯信有安身處塵外寧無卻病方
騎馬夜歸山月上露華清沁苾衣涼

題霍山八景

八景曰龍漱虎崖天池風洞凌霄樹碧桃花試心石狀元臺詩總括

云用嚴解元韻

龍隱靈湫歲幾何虎邊崖石不堪磨天池有水清心目
風洞無人許嘯歌老樹挾霜凌漢外小桃得意笑山阿
石槃未用將心試及第行看細馬馱

題太和縣察院中和巡按諸公韻

日辦綸竿坐海濱
宦途驅轂曉
鞦韆戰酣白蟻風
唱徹黃雞老逼人
南國尊鱸秋後少
東風桃李夜來新
憑君莫訝張羅冷
自要閑居養病身

又

落日哀猿楚澤濱
柴車村路響
磷磷半篙綠水初停棹
一片青帘正喚人
風雨客愁春後積
江山詩句醉中新

小庵睡足真成讖
雲夢南遊寄後身

平生睡足處雲夢澤南州蘇子美詩

中境界今安陸是也而子今謫六安且舊嘗有睡足庵圖印又字畫頗類故或者謂子爲其後身云

至蒙城題莊子詩

和李御史壁閒韻

生前雙蝶夢南華
身後遺經詫百家
短世浮休過風雨
深山雄怪見龍蛇
付之鳶蟻吾何有
觀到濠魚樂未涯

遺跡莫尋秋草合荒郊惟有路橫斜
車塵馬足汴堤長夕影昏鐘客意忙
小犬音聲松下暝
落花門徑晚來涼三生精魄迷前世
四大形骸寄上方
祛掃俗緣觀眾妙一龕燈火夜初央

七夕

人間天上屆秋期梧雨新涼一葉知
銀漢有橋橫鵲尾
金鍼無巧遞蛛絲生謀敢歎中年拙
流俗眞成百世疑
好事總輸兒女輩
列筵張燭夜深時

寄六安東莊練揮使

程已致仕年邁而尚
總侍者故戲之云

一詩問訊東莊老春水門前幾尺深
暮境風煙饒黑髮

向時松竹盡蒼陰
舍西村鼓催農事
池面遊魚慣樂音
猶有夜堂高興在
醉偎燕玉墮瑤簪

謫後出都至潞河留別一二知己

幾年簪筆侍鑾坡
補袞無成笑拙何
雲暗塞垣初失馬
草深門巷近張羅
篋中已斂秋風扇
海外行逢春夢婆
明日江山催遠發
一槎南去泝星河

登霍岳頂

用嚴解元韻

謝卻西風白扇塵
萬山秋氣挹清新
石泉細響聊充樂
霜樹純紅足當春
雲沒孤鴻勞望眼
天留殘照待遊人
醉中忽起幽棲興
何處菟裘好卜隣

曹瞞看八字碑

忠孝古來無二道總因扶世立民彝可憐墓上征西碣
不似江邊孝女碑父子並浮真異事君臣易置欲何爲
月光一似奸心黑不許羞顏見好辭

州人馬致遠藏一卷乃宋徽廟與金締盟約共
滅遼付與降人趙良嗣求滅歲幣御札感而有

作

樓船海上使初回將謂燕雲唾手恢皮幣儘教授北夫
鼓聲不絕向南來一時國論忘唇齒千古宮城變劫灰
展卷忽看遺墨在風煙寒慘助餘哀

美人攜琴圖

綠窗寂寞鎖嬋娟抱得瑤琴不忍彈庭下雙鸞如昨日

曲中別鶴又經年
成都酒甕香傳市
湓浦琵琶月滿船
妙處可聽君莫誤
古音今是十三絃

九日李二守以糕來且以詩誇示用韻走答

詩筆當壇敢下糕
霜天有手慣持螯
解圍謝媪休驚客
破敵周郎未懼曹
揮掃百篇看我捷
搜探萬象笑君饜
酣來不管乾坤大
直欲螟蛉看二豪

李京兆和所作中秋詩調未成詩以自嘲因和

答之

銀燭光中擊鉢催
仗誰喚得謫仙來
庾樓此夜空談麈
金谷當年滿罰盃
飯顆山前嘲杜甫
斷腸句裏困方回
騷壇風月先生事
無賴閒愁且放開

怡靜

生平清僻厭喧囂住近溪山遠市朝紅日透窗春夢醒
白灰撥火夜寒銷松閒有地容拖杖樹杪無風觸掛瓢
心境自安塵跡斷莫教猿鶴引漁樵

遊江心寺

十日都來九日勞偶因山水赴佳招空堂龍出雲衣濕
孤嶼潮來地軸搖江月最宜丹闕鏡海霞還象赤城標
新詩乘醉書塵壁付與山僧慰寂寥

賀丞膺獎

撫字催科兩擅能秋場公賦歲常登名高薦剡優爲吏
座有官箴敢負丞苜蓿未應淹老驥風雲終見奮南鵬

相歡便作湖山醉，憑仗公厨酒似澗。

送嚴推官之漳州任

南望關山憶舊遊，都門分手倍離愁。十年意氣看長劍，千里風塵上敝裘。馬首亂山官樹曉，波心落日瘴江秋。訟平定有吟詩暇，還許新篇寄雁不。

又

宦途世味久諳嘗，又作南行出帝鄉。三尺斗文歸劍匣，百篇風月聚詩囊。馬衝曉色連山霧，雁帶秋威滿路霜。向夜天心孤月皎，瘴痕開處認汀漳。

送褚鳳臺還遷地曹

汀洲落日思依依，別酒相看淚欲揮。雲海忽驚萍跡散，

天津又促使槎歸尙書再賜星階履侍史仍薰畫省衣
老我卻須揩兩眼九霄雲翮看高飛

又

長身曾見峙秋臺文采翩翩邁眾材白傅未悲溢浦謫
賈生今向漢廷回兩年薄宦青衫敝萬里長風畫鷁開
不道清霄雲色淨有人凝立望中台

送府公某得旨解職

宦囊不辦買山錢春水空回載鶴船翻手有雲遮白日
出門一笑看青天官箴未必忘三字公論何消待百年
去矣種瓜何不可東陵還有故侯田

題兩浙清風卷

送大廷王對川還朝

繡裳玉節照華原，獨鶚橫秋健羽翰。
道路盡瞻桓典馬，班行多憚惠文冠。
紫青使者星爲珮，烏府先生鐵作肝。
歸去清風攜兩袖，阜囊吹上五雲端。

壽東樓主人

李侍御父
正月元夕

淑景晴春柳上回，雪痕消到北枝梅。
樓臺燈火烘元夕，嶺海風煙入壽盃。
洞府僊人明月笛，天涯客子縱雲臺。
縣圖故有
縱雲臺無因得扣長生信，極目弧南有鶴來。

又壽李母夫人

舞砌花臺步障聯，午風清裊獸鑪煙。
麻姑行酒麒麟脯，秦女吹簫玳瑁筵。
袍錦未歸瓊苑客，釵金爭擁桂宮僊。
相看鳳闕來鸞詔，記取高堂具慶年。

春江

友人號取采蘋薦藻之意

晴川漾漾柳依依相望江雲對落暉
碧草故迷南浦路綠波堪染漢皋衣
鷗邊夜漲溪毛滑船背春香水荇肥
誰在汀洲頻笑語采芳盈筥未言歸

耕桑課績圖

爲孔丞作

馬上青衫色半枯經行村落戒傳呼
兼旬梅雨催黃犢頻月松廳鎖綠蕪
野老有時陳賣劍山禽終日勸提壺
無因徧紀行春蹟剩遣溪山點畫圖

丁僉憲五色菊畫

淡紅濃紫淺深黃同在東籬各自芳
一種秋風分五色百年佳節又重陽
夕英舊飽沈湘客潭水今傳益壽方

不道開時淪歲晚使君原自愛風霜

鶴骨笛

千古華陽夢不醒長脰裁玉竅還生響穿華表秋雲裂
清激臨臯羽珮鳴霜曉解傳瀛海曲風宵宜按洞天聲
江樓弄徹梅花月招得飛僊下太清

長嘖風宵寂立霜
曉出太白畫鶴贊

夜坐閱詩草

悒悒宵柝掩重關四壁秋蟲叫夜闌茗碗薰鑪扶病體
畫屏銀燭建詩壇墨花落紙松煙潤扇影撩人鬢霧寒
睡思不成吟思涌起將秋色月中看

送陶大尹匯溪之官秋臺

三年宦況清如水百里仁風藹似春無柰荻花秋送客

不妨檣燕曉留人江亭未盡驪歌闕驛路先開馬足塵
此後相思隔南北楚天遙望雁書頻

題畫

春山寂歷亂雲蒸龍氣微噴濕氣生碧澗有聲聞伐木
綠陰隨處護啼鶯人逢道友中年侶樂在瑤琴太古情
芒久卻思歸路晚夕陽回望樹西明

送陳教授遷官秋臺

紅旗畫鼓簇沙堤語燕飛花管別離三載共推時雨化
九遷初到白雲司高談後夜懷師席餘潤他年長桂枝
欲繫仙舟竟卮酒不堪殘柳欠長絲

送鄧學諭之任縣尹

溪風獵獵動參旗蒼莽雲山欲暮時萍水忽驚千里別
酒盃空負十年期青氈舊仰居師席墨綬新看襲漢儀
去矣贈行無別語古來循吏有餘師

姑蘇晚眺

蒲帆一餉卷吳淞晚向蘇門泊去蓬霜樹兩堤江水碧
風簾十里市樓紅雲廊響屨無遺趾夜壑騰金有闕宮
極目川原秋色淡悲笳驚起暮天鴻

沈日休居士壽席致語

太平人物古衣冠洛社高風信許攀壺隱久超塵市外
地行今在列仙閒鼎中丹氣神方秘海上桃花洞府閒
醉倚東風開笑口兩巵春酒照童顏

琴軒

石鼎焚香夜二更小軒清事素琴橫溪山月古梅花老
天地雲閒柳絮輕澗水忽澆箏笛耳僊風時落珮環聲
知音會有窗前鶴爲展瑤徽一再行

秋意

庭皋木落氣蕭森又見西風送暮砧分手竟辭秋後扇
同床思擁夜來衾雁投南國經行遠月近中秋作意深
病起硯屏書句滿可堪光景費搜吟

己亥秋望後李尹招遊元峰卽席有作

十二僊臺倚上清夕陽延客透山明石泉醉漱齒驚冷
松吹坐當衣覺輕佳句偶從山水得好懷都向酒盃傾

相看蹋月尋歸徑一路涼秋絡緯鳴

送沈君紹宗赴天全幕府

十年螢雪謝書幃萬里風塵事馬蹄漢水綠波看鴨放
蜀川春樹聽鶯啼清時幕府稀文檄勝槩邊關壯鼓鼙
卻對雪山迎爽氣朝來瞪目塞門西

贈萬安寺僧成清

利門名路兩無關心在煙雲水石閒秋塔夕陽林影轉
夜堂明月磬聲閒窗前呪食看禽下石上翻經待鶴還
安得便超塵網外一藜相與看青山

送人閩中縣丞

進退韻

江亭南望澹雲峰落日離筵酒易終梯月久期登桂闕

分廳纔喜佐花封，劍津水落灘聲小。鐔嶺峰高，霧氣空
此去哦松，應得句大篇無惜，寄春容。

徵教堂

爲褚正郎賦

芝蘭玉樹砌前楹，又見濠川聚德星。燕寢有香凝坐席，
內簾無語透廳屏。絲綸頒寵龍懸壁，詩禮傳芳鯉過庭。
總道高基隆鉅構，鳳臺今喜近青冥。

鐙夕前一日與客登保叔塔眺望晴湖晚憇孤

山小酌

梵塔亭亭插半空，登臨時喜客相同。山南山北春雲際，
湖水湖煙夕照中。遲鶴漫邀亭外月，觀梅還怯水邊風。
歸鞭三市穿鐙火，遮莫遊人遠避驄。

李明府爲修兒輩書舍柬謝

秋霖正得補天手
夜燭無煩鑿壁翁
滿屋向嘗來落月
重茆今不怕高風
處堂燕雀身何穩
安分鷓鴣計未窮
十載書生困環堵
不才何幸賴帡幪

秋懷

鷄肋功名也自羞
五更殘睡好回頭
山中白酒今年熟
籬下黃花昨夜秋
賈傅未堪傷鵬鳥
魯公直欲問菟裘
西風不管天涯事
只與清砧送暮愁

舟中夢登第

三十年來蹋市塵
槐黃堪喜復堪嗔
庭中車馬慚稽古
天上神仙讓故人
誰遣叢陰藏大幻
固知蟻穴未全真

覺來畫鼓催舟發殘月寒潮送去津

謫所答李明府勉留韻

清時慚負諫官名犬馬寧無戀主情
補袞才猷嗟已拙乞骸心事向誰明
風花過眼真虛夢歲月侵人已半生
歸去亦知林下樂古松蒼石對棊枰

贈一素居士

麤緇大布喜纏身麥飯葱湯敢饋賓
一素足昭天下儉萬金寧濟世閒貧
已看習氣同儒者若住深山卽道人
卻笑肉屏和錦幃業風吹作路歧塵

石屏

天丁鑿玉響瓏瓏九疊三山出意中
雲母乍開秋影薄

水晶低映夜堂空一清雅對鑪煙碧太多翻嫌錦障紅
誰在仙臺橫枕睡片霞移得禦山風

驛中遇雪

土墻茅屋噪昏鴉到驛分明是到家四壁有聲風撼樹
一庭無跡雪飛花客因衣薄頻催火吏爲樽空只煮茶
睡覺紙窗鐙影滅倚牀閑聽蟹行沙

壽友人

中秋後也

銀漢風清蓐氣收弧星入夜照南州天於順境加全福
月到涼宵有別秋玉屑搗霜丹藥就金莖分露桂香浮
停觴借問南飛鶴瀛海今添第幾籌

寄靖守湯鶴峰

湘山九點望中疑杳杳滄波阻會期短刺未投鴻去後
新篇剛寄燕來時風生誕馬行春早漏下鈴齋退食遲
老我莫驅千里駕仁雲無語費遐思

卽事

一樹櫻桃鳥啄殘麥秋天氣尙輕寒蠶登曲簿桑初盡
燕補新巢土未乾病裡古方閒自檢鏡中華髮老羞看
今朝不共劉郎醉辜負東家芍藥闌

報恩樓

取報國思親之意爲褚鳳臺賦

鴛堦鱗瓦碧參差百尺觚稜出翠微拱北獨看紅日近
瞻前時憶白雲飛江湖地遠憂雙闕欄檻春融惜寸暉
卻笑荊州登賦客只將懷土付歔歔

峨眉四老詩 爲少眉譚僉憲作

有親偕老已多年何況高堂四壽全
黃石白猿雙大隱西池南岳兩慈仙
龍光照室封章煥獸錦當堦舞袖翩
指點安期來獻棗海天一鶴駕長煙

紅梅

春情寄向歲寒枝不道東風解出奇
仙府九霞明帳幄漢宮雙額膩臙脂
西湖別有桃源路東閣幾成杏苑詩
風味色香俱上品化工安得謂無私

又

月地雲堦遇絳仙曉鐘聲斷護霜天
江妃被酒粧全改謝女施朱態更妍
晚翠尙須松竹閒春紅不放杏桃先

東風更逞按花手腸斷清香欲破禪

墨梅

爲王主政題

晚粧誰在影娥池狼藉龍煤不自媿白練偶濡游戲筆
緇衣端稱好賢詩印他水月神還在暗盡江雲路莫知
卻笑東風輸眼力粉紅惟賞透牆枝

金竹

高節亭亭耀日光麗江分種到瀟湘將軍畫筆梢全重
鄘塢春風筍倍長影落城南秋瑣碎聲諧簷玉夜丁當
憑誰製作江陵管獨架金樓第一牀

杏花

小紅橋下靠牆枝標格如梅也自奇春意足傳雙蛺蝶

晚風偏妬瘦，麝脂香羅浥。淚同聽雨碎，錦圍春別有詩。
腸斷江南斜日路，采芳誰復寄吾私。

宿雲居山房

和施璉川

世路忘來世，慮微青山獨。喜未相違客，登禪榻鬢絲在。
院廢木蘭人跡稀，習嬾正堪摩詰病。知幾剛道季鷹歸，
佛鐙照影山房寂。捫蝨無嫌解敝衣。

送江大尹膺欽取排律

如雲如霧紫霓旌，指引雙鳧上帝京。楊柳綠搖官道淨，
芙蓉紅映祕圖澄。夢回霖雨三台近，奏罷薰風六氣平。
牧政少年煩兩試，宦城驅轍邁孤征。文章輝世黃金耀，
氣宇凌秋白玉橫。邦禁講明兼讀律，廟謨參與解談兵。

仲淹入閣疏時事賈誼登朝說聖明壯志澄清觀攬轡
不堪經濟卜持衡依依景運從龍起靄靄朝輝待鳳鳴
滿路榮光歌不盡野翁重贈繡衣行

遊霍山頂命坐客出上下韻走筆一首

馬首年來未便東南山佳處若將終醉揮布袖招黃鶴
閒抱瑤琴倚碧松凡鳥未教書石屋籃輿且自造山翁
眼中湖海推豪氣賦裏雄雌誑大風荒殿有基存廟祀
古臺無路問登封草茅零落誰堪柱香火依微略可宗
落日漸看西北去遊人猶自往來逢賞心且罄樽前酒
蓋世誰論紙上功萬事轉頭雲漠漠百年過眼隙匆匆
故山中歲驚藏壑往事千年記指峰詩酒謾教口潦倒

煙雲還幸託
併幪逃名入社
眞堪樂林洞
無煩俗客通
可菊鄉老號

老年全與世相違
覓得寒香種滿籬
秋飲不須人勸酒
夕餐如與客談詩
消磨九日非無景
傲睨清霜賴有枝
會向龍山修故事
帽簷斜插任風吹

贈號一峯

僧

石邊踪跡樹邊身
相對孤峯自主賓
巖瀑不教羣壑占
澗松惟共野猿親
片雲出後秋無伴
雙鶴歸時夜有隣
擬向洞關分半席
披圖須問華山人

漁舟

破浪衝風雪滿顛
浮家一葉過年年
安閒日月紅塵外

疏散心情白鳥邊
養鴨能言聊戲客
得魚沽酒不論錢
清平官府催科少
日晏滄江且醉眠

雪中漫成

用東坡韻

玉環無復辨慈鴉
粉轍從教沒使車
光映八窗欺月色
片裁六出鬪梅花
忍寒東郭先生履
乘興山陰處士家
庭竹不禁堆積重
凍梢摧折亂交叉

水南集卷六

明德清陳
霆聲伯著

五言絕句

雨竹

客路蒼梧晚歸航楚水春
鷓鴣啼不歇江雨正愁人

晴竹

粉墨離離影茶煙淡淡叢
庭空人不見獨鶴受涼風

風竹

秋聲憂鳴球午影搖翠葆
石床無人卧蒼苔藉君掃

鶴膝竹

山居午榻靜茶煙出清樾
老鶴入竹去長脰亂蒼節

白竹二首

開門三尺雪老竹凜清高
竦合玉龍骨光生白鳳毛

又

僊人白玉簫靜夜吹涼月
遺向洞天久春深發枝葉

竹下

爽氣逼蒼雲清風度流水
蕭蕭非俗聲兩耳不用洗

刻潛臺竹

山寺寂無人茶烟繞僧榻
客來若問訊長松我同臘

春景

江水渺渺去春燕何時來
美人不能見隔岸桃花開

老竹

金石平生操風霜太古心山川搖落晚獨節表青林

贈人

詩酒逢人狎江湖載鶴遊蒼梧春望晚石竹淚痕流

看雲卷

雨雲墮急忙晴雲事閒退日日坐看雲青山覘人意

前山漾

和馮南淮

鴈過印秋字波平展晨鏡征棹任奔忙眠鷗自怡靜

道場山

迴谿紅葉漫危磴蒼苔滑山僧不出庵歸雲伴宵榻

峴山牧笛

看天卧牛背橫笛過雲林商畧村童樂分明莊叟心

菱湖漁艇

蓑笠畫中景江山笛裏秋生涯憑舉網適意任垂鈎

書畫船扇面

此詩子守制時作既後謫倅六安爲淮南境內風雨愁悶無日無之

乃知真詩識也

江湖足清事書畫聚一舟掀篷坐風雨管領淮南秋

題扇

贈劉秀才

江月向船明江風襲衣冷芙蓉下秋露人在清虛境

題扇

山月生夜涼松露下秋滴幽人有清事絃琴坐蒼石

漁父扇

酒盈海月空詩枕江聲曉華髮掠西風煙波送人老

倭扇面

風聲南粵長雲氣東溟遠落日海門秋孤帆小於點

春晚

池上來新月庭前有落花小簾藏宿燕淡柳帶栖鴉

夏日園亭

庭竹篩新翠池蓮吐晚紅小魚驚扇影人語畫橋東

夏日渚山堂

涼堂下湘箔濃睡呼不起門外秋意成梧桐滴疎雨

題秋景

茅屋滄洲上叢蘆淺水邊夕陽人語亂知有夜行船

秋夜

人靜孤鴻歇桐疎缺月明珠零短髮鐘鼓記長更

題冬景

香靄煙橫棹清寒雪壓蓬江天真有意着我畫圖中

冬

寒雪堆三尺江梅綻一枝小園門未啟擁被正哦詩

題畫

手持雙鯉魚
目送千里鴈

遠意寄千里相思馮尺素江南落木秋悵悵碧雲暮

題畫二首

幽亭野渡秋遠樹漁村曉萬里弄煙波滄江數峰小

又

展齒印苔痕衣裾染嵐翠幽人住何許茅茨白雲處

赤壁圖

洞簫咽涼露山月泊低樹扁舟醉夢閒孤鶴橫江去

枯木寒鴉畫

青山無古今老樹閱人世歸鴉畧數點寒林便秋意

畫

樹底敞棊亭雲邊卓僧寺蒼苔無歲年芒鞋日來去

又

瘦蹇踏層冰破帽撐嚴雪溪橋晚色至歸路梅花月

書山家壁

竹簟朝收葉銅瓶夜煮茶山家有清供霜月印梅花

又

湖海經年別江山信意遊夜來歸計決秋氣到征裘

題梅花梳盒

畫角寒城晚粧奩古殿春捲簾通素面玉雪倍精神

寒江玩月

朗月印千江千江同一月若作如是觀萬性盡虛澈

拾得翻經

我聞維摩詰默想不作偈回向貝葉書已落第二義

麴院荷風

湖水微微動荷風細細吹錦雲遇十里不覺畫船移

種柏

鋤雲種松柏堅我歲寒意紛紛眾花草且合讓餘地

偶來

偶來石上坐青苔上松根海月悟圓朗山雲習吐吞

和黃仲實遊慈相山寺謁東萊讀書堂

羣峰抱幽壑松吹灑清夏山閒朝雨歇流泉漫清舍

又

空山侶猿鶴終古遠是非風簷展書讀林月來清輝

半月泉二首

石窟泉半泓石壁蘚成字山僧汲蒼月對客論茶事
靈源啟心印一鑑攝萬有天光玩徘徊蒼石踞來久

五言古詩一首
白雲泉半巖石壁
山勢如畫
樓台錯落
水石相映

平仄詩一首

空山翠嶺
古松
翠嶺
古松
翠嶺
古松

又

翠嶺
古松
翠嶺
古松
翠嶺
古松

黃林真詩一首

翠嶺
古松
翠嶺
古松
翠嶺
古松

水南集卷六

水南集卷七

明德清陳 霆聲伯著

七言絕句

白頭鳥

老去身心不自由，滿腔柳恨與花愁。
春風一種閒禽鳥，合爲多情白盡頭。

又

過眼年光水共流，花時剛憶少年遊。
須知一種春風恨，傳到山禽也白頭。

蜻蜓蛺蝶

閒花野草年年發，蛺蝶蜻蜓日日忙。
畢竟春光誰管得，

繡簾斜日過西廊

題慈烏

金井空寒月一枝風瑯不定夢驚疑
夜深無限南飛意正是幽人未卧時

螳螂

捕罷寒蟬掉臂行
荳花籬落露珠凝
機心正得幽人笑
誰遣焦桐有殺聲

秋塘鵲鴿

兩兩啁啾急難多
晚風吹冷白蘋波
叢蘆深處休菱唱
待聽淮南粟布歌

畫眉鳥

曉鏡纖毫懶自持，翠痕消滅怨芳時。
多情却有花閒鳥，時爲東風巧畫眉。

雙鷹

卑栖鷦雀蓬三尺，安分鷓鴣月一枝。
壯志已銷慵搏擊，秋風拭眼看人爲。

啄木鳥

幽人晝卧不知起，剝啄是誰來扣門。
獨見葉閒飛野鳥，綠槐無數暗山村。

蘭

汀蘋岸芷江湘路，想得靈均正獨醒。
乞與春風開九畹，小窗啜茗著騷經。

牡丹

紫絲十里春風暖
黑牯千頭醉客豪
富貴易消春易老
主張國色賴纖毫

黃紫菊

俗名紫袍金帶

十年金紫誇春夢
九日樽罍嗅落英
病客不驚詩思惱
滿天風雨暗山城

紅菊

九華仙子黃裳古
試改嫣紅也自奇
畢竟風霜高性在
不教春蝶到秋籬

菊花扇

野菊叢叢曉露浮
小園芳意古菟裘
西風萬點金錢散

乞與人間富貴秋

過牆梅

水月精神玉雪姿貞心全在未開時
出牆誤拂行人首
被作春風外路枝

萱草

俗名鹿
蔥花

木藥紅黃進內家沉香亭宇闌繁華
東風野鹿芳香盡
千古遺蓼發夏花

芙蓉

錦城千本照江紅折取芳心露一叢
莫笑清霜秋太冷
未甘陪面向春風

紅梅

香腮畧畧點丹砂便覺風情自一家從此孤山迷醉眼
不知是杏是桃花

又

第一枝頭第一花天教寒雪變晴霞東風照暎春冰綠
乞與青皇點歲華

白梅

鶴跡沿堦夜雪殘起循花影玉龍寒霜禽栖定僧鐘歇
月在東樓第二欄

墨梅

照影元從洗硯池素肌應怯洛塵緇溪橋月黑黃昏夜
別有東風意外枝

菜

藜藿年來慣我腸
齒根嚼處響宮商
直教梁肉都迴避
日午山厨炒味香

蘇李泣別

山頭兵盡無心死
海上年深有路歸
心事不同同有淚
可憐都濕漢時衣

書贈王節判

王泗州司馬

青衫華髮映江臯
投老官銜是馬曹
醉倒偶然忘世事
滿淮風雨浪痕高

昭君怨

出塞風塵萬里行
仰看飛鴈向南征
玉關自喜無宵警

不道琵琶泣月明

又

琵琶猶撥漢宮詞
萬里寧胡死不辭
却信主恩仍舊薄
不教麟閣畫蛾眉

太行分秀

爲張太守題

星輶遠見長安日

絕頂有星輶驛

鳥道回瞻狄相雲
解使西林

分旺脉終成秀色
蓋橫汾

漳水合流

西林急注連宵雨
漳水平添拍岸波
却遣星槎乘遠浪
使君從此上天河

佛頂摩雲

半山樛木蒼龍老拂地長煙白鳥低不道境連千嶂迥
要看人與五雲齊

鷲坡鋪翠

空山入夜聞笙鶴絕壑多年卧蟄龍欲訪□人不知處
亂雲冥霧翠重重

藥王勝會

花村榆杜喧簫鼓桂殿松堂爇瓣香見說仙桃蠲世疾
故應神力駕農皇

樂女仙飛

銀潢不隔乘槎路仙島還通泛海津裊裊天風吹珮起
九霄無跡去無因

題畫 秋景

崖樹經秋葉半黃，瘦筇扶客過重崗。
白雲不礙山閒路，隨意尋詩到夕陽。

題畫

樹底重茅被翠蘿，啟窗遙見客來過。
經旬不出衡門去，林外秋風落葉多。

題畫

雪中老鶴肩雙聳，月下疎梅蕊半開。
清興作何消受得，小窗呵筆更啣杯。

五月林閒積雨東方大尹

梅雨浸滌五月天，四郊白水澹炊烟。
不知綠樹重簾下，

多少薰風入舜絃

夔頡侯

櫟釜聲中客告辭可憐邱嫂茂恩私不如西楚真同氣
尚乞盃羹戰鬪時

題畫 凡三首

石壓危橋樹蔽亭水聲瀾瀾亂松聲有來皆是山中客
不用閒雲管送迎

九月江南木正凋西風吹冷木綿袍一詩坐對青山好
不覺殘陽下樹梢

紅樹青山日向晡小舟一葉閣叢蘆人家更在洲南住
剩與秋江點畫圖

題畫

湘桃
鴝鵒

露潤桃花曉日遲
寒皋竝立趁朝曦
東風吹綻還吹落
似抱春愁不忍飛

秋江晚釣

萬木蕭條秋氣高
澄江何處汎輕舸
道人不是思鱸者
獨把長竿釣巨鰲

秋詞二首

刺桐月上晚涼多
秋入屏山冷簟波
殘夢覺來雲鬢散
珊瑚枕上墜銀鵝

隔牆忽地起笙歌
吹入珠簾韻調和
秋色一天諸院寂
不知何處月明多

長門怨

紗窗春倦困騰騰
挨到黃昏恨轉生
滿地梨花明月裏
九宮處處鎖門聲

木棉花

游蜂狂蝶且休忙
花本無心學艷粧
曉露滿筐貧女摘
禦寒聊作嫁衣裳

春

護寒簾幙未曾開
手理梅粧倚鏡臺
小院不知春早晚
杏花零落燕歸來

初夏閨意

古槐夾道綠陰濃
窗揭蟬紗透午風
閒得日長無一事

玉塔自理鳳仙叢

墨菊

秋色新移到石庭
曉隲風露正相凌
落英冷透詩脾潤
流出胸中墨數升

葡萄

黃金索斷走驪龍
影落溪藤奪化工
吐出明珠三百顆
一窗秋色墨痕濃

葡萄架

火日行空草樹黃
幾思赤脚弄滄浪
石家錦幃誰能辦
且蔭葡萄一架涼

題障扇

贈東莊老隱

素手纖纖紫玉圓
碧巾一幅水晶寒
繡簾明月留歌舞
障得清音繞畫欄

無題二首

香銷銀鴨尙餘熏
暝入紗窗日漸昏
回首月明金鎖上
一庭芳草閉重門

銅壺催箭漏聲稀
銀漢西流月影低
別院笙歌傳遞早
夢回鴛枕誤聞雞

巖子陵

物色徵書下釣磯
交情如此昔應稀
後來却背糟糠義
又是先生早見機

貴妃琵琶師

如善琵琶所御乃紫檀香背有金縷紅紋蹙成雙鳳宮中戚里嬪主

皆拜爲
琵琶師

龍樓清夜障金鷄紅手琵琶醉裏詞
月色過牆花影密
壽王潛聽獨多時

沈烈女

荆釵尙未講齊眉
蘆港誰知伏禍機
千古磨笄山下血
鮮鮮猶染葬時衣

邵節婦

過船肯學琵琶婦
舉箸誰甘狗彘腥
便作扼吭英烈死
男兒還合愧儀刑

洪烈女

本因多露畏晨行
覓得仙潭欲避兵
却向波心葬魚腹

思量贏得水潭清

野夫

青山轟轟當座隅
猿鳥窠邊小結廬
秋深門徑少人跡
柿葉殷紅堪學書

題僧壁竹

松窗青斷煮茶煙
一卷楞嚴閱未殘
庭下莫教風竹亂
山僧剛懶報平安

書寺壁

一印清香一鼎茶
坐看東日又西斜
楞嚴不展心常定
四十頭陀晚出家

偶成

春睡起來春事晚夕陽芳草漸鳴蛙瘦藤閒策東風路
時見棠梨落數花

雨中

九十日春恆雨中小園門閉鳥呼風蒼苔獨慰閒人意
沿上紋堦伴落紅

又

九十日春稀遇晴不聞鵲喜熟鳩聲庭花落盡柳煙重
坐見滿池春水生

書寺壁

走聽流泉坐看雲寬袍方舄副綸巾青山若要知名氏
不是仙人卽道人

花鳥

長到芳時易作愁日高濃睡懶回頭東風花鳥無情物
消受春光得自由

題畫

柳下孤舟恰受呼江南游客倦長途春風綠遍湘潭草
是處空山聞鷓鴣

書道士姜守榮扇面

前度劉郎鬢已疎看花無分到玄都黃冠何日東歸去
一舸秋風老鑑湖

睡漁圖

九月蘆花雪滿灘月光山色共蒼寒西風一夜滄洲夢

忘却船頭起釣竿

有感

綠綠春風草滿汀
亂山斜日鷓鴣聲
相思不見湘中鴈
腸斷春江煙靄生

倦繡圖

一雙燕子重門翠
二月楊花斗帳紅
春思困人渾欲睡
玉闌干外倚東風

夏日西樓

紅藕花開水氣香
晚雲飛雨過池塘
不知楊柳風多少
只覺西樓滿屋涼

新秋

芟衣涼怯扇羅收旋理濃薰備夜篝點滴井桐枝上雨
替人一夕做成秋

乞筆

晴窗墨陣走玄雲驅掃家雞入雉羣乞我健錐三四箇
助他憔悴舊將軍

石田畫

濕氣蒸雲曉未乾空山一雨洗龍涎幽人雙耳貪清響
慚愧春雷百道泉

夏

等是閑人懶治生飯餘來此對棊枰青山欲遣娛長日
交付松聲與水聲

秋

隔水崗原野樹紅閒從晚翠數秋峰白雲相約山閒宿
容易幽尋到暝鐘

冬

歲晏江雲凍欲垂溪山雪夜愈清奇月寒不見山陰棹
簷外梅花却欠詩

柳浪聞鶯

岸綠山紅映酒船舞衫歌扇落花天春風欲勸游人醉
更送鶯聲到水邊

又

紫蝶黃蜂日日忙嬌鶯殊亦惜風光一聲啼破重湖綠

三十六陂春草長

和方大尹溪行卽事

溪水溶溶漾綠苔
柳汀鋪絮雪成堆
春風畫錦經行處
一路薔薇照水開

又

四顧川原綠意新
秧針出水雨初勻
綵旌自爲溪風颺
却怪沙鷗遠避人

又

三兩浮家古柳邊
日高尙有醉漁眠
提壺勸飲非無謂
官府新來減稅錢

又

麥隴桑阡跡屢經村行纔徧又溪行南風慰藉憂勤意
吹送纜車隔水聲

晚泊

蕭瑟黃蘆夜有霜月寒江水兩茫茫夢同何處吹漁笛
共咽灘聲一夜長

題畫

偃蹇蒼松障午陰綠苔聊復藉爲茵莫教到此談塵俗
隔岸青山冷笑人

又

睡起心情偶自閒兩枚詩屐叩柴關小亭卧倚菱溪石
飽看淮南雨後山

楊妃菊

一抹臙脂點醉容
沉香亭宇又西風
花鈿誰遣遺蒼石
化作秋英取意紅

閒中偶書三首

時寓京師

杏花春雨憶江南
布被寒多擁暮酣
想得歸途天氣暖
水邊羅扇試輕衫

又

窗戶重重掩薄紗
舊巢燕子落誰家
東風欺得無人在
故着春寒勒杏花

題畫

石檻芭蕉綠漸肥
茶煙漠漠透松枝
長空白日無多子

剛了山中一局棋

又

黃葉亂山都是秋水將寒碧石邊流坐吟未了昏鐘起
又報浮生一日休

又

向壁銅瓶沸有聲掛簷冰筍雪初晴相看今夜西窗話
直過梅花月二更

夢中作

長髯冉冉半成醉緒夢悠悠不盡頭擁被忽聽門外雨
山中又作去年秋

雨竹

石痕慘淡千年淚野色冥迷一片雲古廟空山人不見
東風吹雨着湘君

風竹

響疑落葉窗初靜掃退寒雲日正晴天亦知人間兩耳
獨教林下聽秋聲

湘竹雙相思鳥

野竹斑斑浥淚痕九嶷無處吊湘君相思愁老雙飛翼
春暗蒼梧一片雲

題畫

釣竿已了浮生事詩話仍延澤國秋却笑黃塵靴帽底
西風無夢到滄洲

數莖華髮對青山拍枕煙波一棹閒酒醒江風來扇底
夢回巖月墮蓬間

桐村放牧

孫氏毓靈八景

兩竿斜日牛羊外一笛西風草樹邊却信太平村社富
滿羣鵝鴨散平田

蓮塢歸樵

煙雲擔重妨輕步空翠秋深濕短衣人坐茅簷候歸影
山莊煙火正依微

新塘釣月

月鉤印水驚魚目藕蒂牽絲惹鷺翎衣冷欲成滄海夢

孤舟橫泊蓼花汀

姜陵書舍

滿庭碧草搖書帶堆案青編走蠹魚絃誦已成君子室
荔蘿還似野人居

絲壑晴氛

氤氳併與雲俱出飄蕩還當日正晴十里青松人不見
只聞流水度灘聲

春

沈石田畫

行盡青松不見人小亭空對謝公墩夕陽橋下春泥滑
只與山閒顯屐痕

夏

永日雲林獨往回履痕曾不污蒼苔青山勿用相疑忌
不是閒人那得來

秋

隔水亂山秋更宜坐深渾不記來時白雲黃葉他無事
日與閒人了一詩

冬

山崦人家盡閉門鳥迷林樾客迷津長竿不避蒙頭雪
故是江湖好事人

春

單題

籠中鸚鵡貪春睡架上茶蘼怯曉寒天氣半晴風力軟
柳絲一把卧闌干

夏

風簾密影芭蕉綠
水檻幽香菡萏紅
夢裏江南多少路
爐煙縈繞畫屏風

秋

銀床索索翻梧葉
寶枕粉粉墮桂花
千里懷人作長夢
夜寒飛不到天涯

冬

小庭一樹玉梅花
雪裡傳春到我家
夜半鶴醒琴調響
溪山清冷月痕斜

春眠

布衾寂寂擁春眠
薰徹香篝夜炷殘
宿酒醒來門外曉

一簾風雨杏花寒

夏日雜興

小小池亭面面風
煩蒸不到樹陰中
浮萍着雨都開散
放出荷花自在紅

又

廣簷高厦午風清
一炷爐煙裊畫屏
小枕正鼾門有客
隔簷鸚鵡喚人醒

又

清曉尋幽到水涯
柳風招我立鷗沙
夜來一雨添新漲
石底溪流出棟花

又

信手拋書意甚慵
竹床設近素屏風
黃簾綠幕無蠅到
卧看榴花雨後紅

又

池館幽窗俯碧虛
水涵清氣潤圖書
微風爲約浮萍住
容我凭闌看戲魚

夏日燕居

默坐澄心覺得涼
水盆蒲石玩青蒼
軟屏爲拉閒人住
不放爐煙出畫堂

午睡

壺冰清澈畫堂虛
日影消磨几上書
富貴百年成一笑
大槐宮裡駕高車

又

池上輕雷驟雨晴
卷荷風觸露珠傾
晚涼浴起披襟坐
待得樓頭淡月生

春

鍾欽禮山水畫

食壘酒罇隨意挈
獨尋芳草度前崗
綠搓線柳風能轉
紅落仙桃水亦香

夏

屋後濤聲瀑布寒
清颺時復到松閒
酒盃未至如泥醉
撐眼還能仰看山

秋

山水窟中浮一舟
酒盆詩卷在中流
松閒亭子最宜客

相對黃雲野寺秋

冬

古木空崖雪乍晴
酸風滿馬作山行
不如乘此尋梅去
十里清香月正明

棄瓢圖

徙倚蒼崖紫翠重
老樗無力聒秋風
棄瓢千古真多事
何似相忘一笑中

水南集卷七

水南集卷八

明德清陳
霆聲伯著

三言

題四景

春城外桃柳花雙燕子歸誰家

芭蕉檻午睡涼日影上閒人床

蘆荻風釣船漾明月在秋江上

風雪緊驢背寒歸戶卧師袁安

四言

題畫

白雲遠近青山古今澗流青碧松落秋陰石砭倚杖茅

屋鳴琴歲華向晚聊慰幽尋

題沈石田秋崖圖

千崖作秋上有飛瀑白雲在嶺黃葉彌谷川光忽開沃
野當目十里之外返照茆屋歲云暮矣人返初服澹其
忘歸有飽杞菊

六言

題畫

路崎嶇而莫適屋窈窕以無關問流水兮何急對白雲
兮心閒

花港觀漁

晴沚錦鱗衝絮煖風赤鯉吹漚倚檻方看魚樂隔花又

見漁舟

蝴蝶

莊子榻前午夢滕王筆底春風何處春光最好賣花聲
在橋東

江鄉小景

芳草渡頭齊綠夕陽山外微紅誰在江南春晚相思不
見歸鴻

漁舟觀書

綠樹青山霽後綸竿釣餌收餘午醉醒來無事水風涼
處觀書

春

柳下閒人管渡江南倦客懷歸斜日杏花亂謝輕風燕子交飛

夏

白鳥林煙淡靜黃鸝隴樹清圓日午陰生短榻春深水滿平田

秋

詩夢半蓬涼月江聲一枕新秋身世總歸幻境乾坤不碍虛舟

又

鷗邊短帆暮浦鳥外遙山夕暉黃葉一林歸思江東又搗秋衣

冬

雪月清奇未了，溪山應接無窮。清興總教自得，故人何用相逢。

三五七言

七夕

風細細，月斜斜。三星輝，寶炬五彩動。雲車盈盈秋水經年渡，脉脉柔情兩地嗟。

中秋

雲炯炯，桂團團。乾坤無點翳，風露不勝寒。鳳笙吹醒瑤臺夢，人在清虛碧落閒。

重九

山氣爽夕寒加瓦盆便白酒野意足黃花世間邊幅知
何用笑倚西風醉帽斜

冬至

梅有信雪催詩玉葭灰正動宮線日初遲未論剥復人
閒事且慶團圓掌上卮

九言

春

江南春信先到寒梅花道旁村舍中有賣酒家解衣就
榻且覓一覺宿醉回夢轉殘月窺窗紗

夏

柳花糝糝飛泊橫塘東研綾扇舉稀葛來輕風午閒一

雨梅暑倏驅退石榴亂點遙映霞裙紅

秋

江邊烏柏頰葉酣新霜鱸魚乍美人正思吳鄉鴈將秋色迤邐向南去回首獨立山外明斜陽

冬

茅茨掩上門外風色寒溪山向晚樵牧爭渡□雲開凍解一雪霽千里月色朗處照着山陰船

雜詩

居山寓藥名詩

怡靜常山居山空青四圍洗竹瀝秋水伐木通巖扉泉甘草長茂路滑石多奇薄暮虎狼毒樵柴胡不歸

甘草 山谷晦菴皆有十二辰詩戲效一首

太倉官鼠飽空腹敗壁蝸牛戰蠻觸窗間談易虎皮尊
架上策勳兔毫禿春厨午饌了籜龍臨池草聖秋蛇雄
壯懷已遂駟馬願素節正慕羔羊風紛紛沐猴假冠蓋
蹇處鷄羣未爲害東門黃犬多禍機好學商工牧猪賣

□ 箴 謠

長古體

金蟆吐月射碧練榆渚涼秋曉星亂綠雲堆枕畫蛾損
十指龍煤漬紅粉水心層浪吹作風皺裙摺摺石榴紅
仙乎去來袖雙舉一片湘雲墮瑤水

秋夜曲

紫鸞露下啼涼月綆斷銀瓶水花結沈雲瀉空秋覺冷

玉杵淒淒抱霜影銅盤香蠟雙泪光被池蹙疊紫鴛鴦
楚峰作屏翠裊裊十二巫山帳前繞巫雲散去湘雲曉

集古 山居

山靜似太古竹暗不通日間來石山眠一鳩鳴午寂

無題

集李商隱晏叔原沈雲卿李材
李遠晏同叔朱希真向伯恭

來是空言去絕踪樓頭殘夢五更鐘雲間鶴信三山遠
天上銀河一水通碧落有情空悵望峽雲無跡任西東
少年易感傷春恨愁對寒燈數點紅

又

馮延巳錢起辛稼軒陳后山
胡宿宋徽宗傅與礪朱叔賢

夢見雖多相見稀楚鄉雲雨盡堪疑一春魚鴈無消息
千里關山費夢思已託焦桐傳密意却教鸚鵡念新詩

香巾未解來時解悒悒柔情不自持

玳柄素扇

海宮一夜琅玕折龍女織綃指流血水仙挈取竄瑤闕
重竊嫦娥半輪月首山銅神達關節鈴束之間着機括
鸞翎鶴翅展飄雪坐召仙風入雙腋青冥夜氣沁冰穴
編玉無聲羽車歇牙梳挨枕寶簪脫夢覺風櫺月痕缺

虎畫

目光如電鬚若錐眈眈踞坐凜作威磨牙礪爪將奚爲
取次噉食狐與狸綠林夜客擾犬鷄偶然相值非所期
莽間血肉靡孑遺天固假手償羣黎坐令山谷無驚虞
藜藿不採茅不蹊謂子曰猛誰則知譬則武將雄邊陲

三人傳市已可疑翼而以逞亦足危政苛而甚甚則斯
乃損汝德非汝宜松林月黑獵騎歸草頭暗動鴝鷓啼
一聲猛嘯驚前驅陰寒滿壑風颼颼

鳳臺篇

褚推府號褚
乃鳳陽人

危乎高哉鳳臺去地幾百仞兮吾見其突兀而沖天土
有挂猱墜石之懸崖兮下有濺珠噴沫百道之飛泉鳥
道莫度兮青巒九點渺空翠語笑人與雲霞連風雷發
從地底兮大氣磅礴孰知極但見龍崗鸞阜遠近起伏
而綿聯荆山西來赴其會是爲臺之右脉兮襟帶長淮
千里環清漣臺之仙兮錦綺裘掀髯吐氣兮炯炯雙星
眸瑯玕呈袖兮帝閭曉干將出匣兮紫氣挾透豐城幽

一麾江海我何屈矮屋之下還伸頭年來志魄益高壯
還視鳳臺之高高兮方期挾後身之謫僊吸采石之斗
酒仍賦長江入海而東流鳳兮恆相從臺也難淹留太
平有道兮主聖而臣碩隆然盛治侔西周朝陽載昇崗
梧孔稠鳳兮有音叶韶濩卷阿聯什諧歌謳是將追夔
后于虞廷兮乃身羽儀而聲鳴球歸來鳳臺上俯視一
世真蠓蜉羽衣舞澈紫雲迥玉笛吹斷兮黃鶴飛下城
南樓左捫匡廬峰右踏鸚鵡洲鳳兮鳳兮相追遊一鳴
一應終千秋